



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-347-4/23**

Datum: **18.08.2023. godine**

„Agencija za vodno područje rijeke Save“ Sarajevo (u daljnjem tekstu: Agencija) rješavajući po zahtjevu pravnog lica „ŠIROKI PUT“ d.o.o. Cazin, za izdavanje vodne dozvole za ispuštanje tehnoloških otpadnih voda i ispuštanje oborinskih onečišćenih voda iz pogona za proizvodnju betona i betonske galanterije, izgrađenog na lokaciji u naselju Ostrožac u gradu Cazinu, na osnovu člana 139. stav 1. tačka 3. i 10. Zakona o vodama („Službene novine Federacije BiH“, broj 70/06) i člana 200. Zakona o upravnom postupku („Službene novine Federacije BiH“, broj 2/98, 48/99 i 61/22), donosi:

RJEŠENJE **o vodnoj dozvoli**

1. Daje se vodna dozvola pravnom licu „ŠIROKI PUT“ d.o.o. Cazin za ispuštanje tehnoloških otpadnih voda i oborinskih onečišćenih voda iz pogona za proizvodnju betona i betonske galanterije sa pripadajućim manipulativnim površinama, izgrađenog na zemljištu označenom kao k.č. broj 684/2 K.O. Ostrožac (novi katastarski operat), u naselju Ostrožac, grad Cazin.
2. Ova vodna dozvola se odnosi isključivo na ispuštanje tehnoloških otpadnih voda i oborinskih onečišćenih voda za predmetni poslovni objekt definisan tačkom 1. ovog rješenja i ne oslobađa podnosioca zahtjeva obaveze pribavljanja vodne dozvole za korištenje vode i ispuštanje sanitarnih otpadnih voda, za čije je izdavanje nadležno Ministarstvo poljoprivrede vodoprivrede i šumarstva Unsko-sanskog kantona, u skladu sa članom 139. stav 2. tačka 1. i 2. Zakona o vodama.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1. Da korisnik predmetnog objekta postrojenja za proizvodnju betona – betonare i proizvodnje betonske galanterije, za sve vrijeme važenja ove vodne dozvole, isti održava u funkcionalnom stanju i koristi u skladu sa njegovom prirodom i namjenom prema dostavljenoj revidovanoj projektnoj dokumentaciji – „Glavni projekat vanjskih hidroinstalacija za pogon za proizvodnju betona i betonske galanterije sa pratećim sadržajima“ te u skladu sa uslovima iz ove vodne dozvole.
 - 3.2. Da se istrošena ulja, nauljene krpe i sav opasan otpad koji se može pojaviti u proizvodnom procesu i u procesu čišćenja i održavanja postrojenja i radnih mašina redovno prikuplja i propisno, privremeno skladišti u spremnike, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.
 - 3.3. Objekte za prikupljanje, tretman i ispuštanje tehnoloških otpadnih voda (taložnici, slivnici, rešetke, kanalizaciona mreža, uređaji za tretman i dr.) potrebno je održavati i koristiti na takav način koji će obezbijediti njihovu potpunu ispravnost i funkcionalnost. O načinu i vremenu radova održavanja neophodno je voditi službenu evidenciju i arhivu.

- 3.4. Da se oborinske vode sa krova objekta kompleksa betonare pokupe i zatvorenim sistemom kanizacionih cijevi odvedu direktno u recipijent, odnosno, uraditi sve prema projektnoj dokumentaciji iz tačke 3.1. ovog Rješenja.
- 3.5. Da se sa opasnim i štetnim materijama (aditivi betonu, ulja, naftni derivati i sl.) postupa savjesno pri skladištenju, transportu, pretakanju i pretovaru kako ne bi došlo do štetnih posljedica uslijed prosipanja istih.
- 3.6. Da se tokom važenja ovog Rješenja obezbijedi minimalan broj uzorkovanja otpadnih voda iz okna za monitoring (mjerno mjesto definisano projektnom dokumentacijom iz tačke 3.1.), u skladu sa Uredbom o uslovima ispuštanja otpadnih voda u okoliš i sisteme javne kanalizacije, („Službene novine Federacije BiH“, broj 26/20 i 96/20), te pojedinačne i zbirni izvještaj dostavi Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav 3. Zakona o vodama i Pravilnika o uslovima koje moraju ispunjavati ovlaštene laboratorije i sadržini i načinu izdavanja ovlaštenja («Službene novine Federacije BiH», broj 54/99).
- 3.7. Ukoliko Vlada Unsko - sanskog kantona propiše dodatne (strožije) uvjete za ispuštanje otpadnih voda u površinske vode, od uvjeta definisanih u tabeli 1. Priloga 27. Uredbe o uslovima ispuštanja otpadnih voda u okoliš i sisteme javne kanalizacije, podnosilac zahtjeva je u obavezi iste zadovoljiti.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisne obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 06/16), Prilog 1. Poglavlje V – Određivanje koeficijenta zagađenja za zagađivače voda kod kojih se ne vrše direktna mjerenja, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, korisnik pravno lice „Široki put“ d.o.o. Cazin je dužno provoditi sve mjere i aktivnosti propisane istom.
6. Ukoliko radom predmetnog objekta dođe do promjene režima površinskih i/ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
7. Ukoliko uslijed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima ili postrojenjima predmetnog objekta obuhvaćenog ovom vodnom dozvolom, korisnik zaštitnih vodnih objekata nije odgovoran za nastale štete.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. Ova vodna dozvola, shodno članu 117. stav (1) Zakona o vodama se daje sa rokom važenja od **5 godina**, od dana pravosnažnosti ovog rješenja.
10. Prije isteka važnosti ove dozvole, pravno lice je dužno da podnese zahtjev za izdavanje nove vodne dozvole.
11. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. i 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Pravno lice, „Široki put“ doo Cazin obratilo se ovoj Agenciji dana 11.08.2023. godine sa zahtjevom za izdavanje vodne dozvole za ispuštanje tehnoloških otpadnih voda i oborinskih onečišćenih voda iz pogona za proizvodnju betona i betonske galanterije u naselju Ostrožac, grad Bihać.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Ovjerena kopija Rješenja o upisu u sudski registar, broj: 017-0-Reg-06-001 301, izdanog dana 06.11.2006. godine od strane Općinskog suda u Bihaću,
- Ovjerena kopija Uvjerenja o poreznoj registraciji, izdanog dana 14.07.2006. godine od strane Federalnog ministarstva finansija, Porezne uprave – Kantonalni ured USK Bihać,
- Kopija Uvjerenja o registraciji obveznika poreza na dodanu vrijednost, broj: 04/1-UPJR/1-211-2/08, izdanog dana 17.01.2008. godine od strane Uprave za indirektno – neizravno oporezivanje Bosne i Hercegovine u Banja Luci,
- Kopija uplatnice upravne pristojbe i kopja uplatnice posebnih troškova po Zaključku,
- Kopija pravosnažnog Rješenja, kojim se daje odobrenje za legalizaciju bespravno izgrađenog poslovnog objekta automatizirane bloketare, betonare i platoa za proizvodnju betonske galanterije gabarita 12,38x26,90 m, na građevinskoj parceli označenoj sa k.č. br. 684/2 k.o. Ostrožac, po novom kat. operatu, u ukupnoj površini od 1,98 m², a koja se nalazi u naselju Ostrožac, investitora „Široki put“ doo Cazin izdanog od strane Službe za urbanizam, zaštitu okoliša i inspekcijske poslove grada Cazina, pod brojem 04-19-1861/2023, dana 12.06.2023. godine, u Cazinu,
- Kopija izdatog Rješenja o vodnoj saglasnosti izdana pod brojem: UP-1/21-2-40-196-2/23, od strane AVP rijeke Save Sarajevo dana 24.05.2023. godine,
- Glavni projekat vanjskih hidroinstalacija za pogon za proizvodnju betona i betonske galanterije sa pratećim sadržajima investitora „Široki put“ doo Cazin, izrađen od strane ovlaštenog projektanta „SENDO“ doo Sarajevo bez broja aprila 2023. godine u Sarajevu, – revidiran od strane „Smajić Inženjering“ doo Goražde pod brojem 335-REV-23-K od 27.04.2023. godine, (na uvid)
- Izvještaj komisije za tehnički pregled od 27.07.2023. godine, imenovane Rješenjem Službe za urbanizam, zaštitu okoliša i inspekcijske poslove grada Cazina broj: 04-19-3050/2023 od 25.07.2023. godine,

Nakon pregleda dostavljene dokumentacije, u skladu sa članom 21. stav 5. Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15, 55/19, 41/20, 63/22), izvršen je obilazak proizvodnog pogona za proizvodnju betona sa pripadajućim manipulativnim površinama „Široki put“ d.o.o. Cazin, pogon lociran u naselju Ostrožac, grad Cazin, i tom prilikom sačinjen zapisnik o uviđaju broj: UP-1/21-3-40-347-3/23 od 16.08.2023. godine.

U krugu pogona locirani su slijedeći objekti: objekat automatizirane bloketare i betonare sa upravnim prostorijama, prostor za skladištenje agregata za proizvodnju betona u 4 spremišta - boxa, objekat betonare kapaciteta 15 m³/dan, vertikalni silos za cement kapaciteta 70 t, sanitarni prostor za radnike, parking prostor za osobna vozila i radne mašine, te manipulativnog prostora. Radni i manipulativni prostor je tamponiran. Agregati za spravljanje betona se kamionima dovoze sa ovlaštenih kamenoloma u Cazinu. Voda za spravljanje betona se koristi sa javnog gradskog sistema.

Oborinske vode sa manipulativnog platoa pogona, koje mogu biti zauljene naftnim derivatima od radnih i transportnih mašina, te vode sa radnih prostora betonare, koje mogu sadržavati opasne suspendovane

materije, jednim dijelom se kupe u taložnik pored betonare, a drugim dijelom slijevaju na okolni prostor bez prethodnog tretmana.

Tehnička dokumentacija, na osnovu koje je dobiveno odobrenje za gradnju, je priložena na uvid. Do momenta izvršenja terenskog uviđaja nije vršeno mjerenje kvaliteta otpadnih tehnoloških voda, pravno lice nema sklopljen ugovor sa ovlaštenim pravnim licem za vršenje istog, s obzirom da se radi o novoizgrađenom pogonu.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva, „Široki put“ d.o.o. Cazin, ispunio minimum uvjeta za izdavanje vodne dozvole, kako je to regulisano članom 115. do člana 118. Zakona o vodama („Službene novine Federacije BiH“, broj 70/06) i članom 12. i 132. Pravilnika o sadržaju, obliku, uvjetima izdavanja i čuvanja vodnih akata, te je riješeno kao u dispozitivu ovog rješenja.

Podnosilac zahtjeva je na ime izdavanja ovog vodnog akta izvršio uplatu pristojbe na osnovu Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, broj 06/98 i 8/00).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta

Fuad Mujagić, dipl. inž.

**Po ovlaštenju
Rukovodilac sektora za izdavanje
vodnih akata**



Haris Ališehović
Haris Ališehović, dipl. inž. građ.

Dostaviti:

- „ŠIROKI PUT“ d.o.o., Ostrožac 225, 77 228 CAZIN
- AVP Sava, ISV – Vodna knjiga
- Sektor 50
- ⊙ Sektor 40, arhiva
- Oglasna ploča-AVP Sava